



Komunikado

17 òktober 2018

Cft: Ta tempu pa awor si Kòrsou realisá finansa públiko duradero *Palabrashonnan nobo entre gobièrnu i Cft mester bòltu e situashon*

Willemstad – Un esfuerso substansial a keda hasí pa balansá e presupuesto di 2018, sin embargo Kòrsou su problemátika presupuestario di mas aña ketu bai ta keda preocupante. E pais ainda no tin su maneho finansiero na òrdu. Pa e motibu aki Cft a yega na palabrashonnan ku gobièrnu kon pa yega na finansa públiko duradero.

A base di e dokumentonan ku Kòrsou a entregá (e adaptashon di presupuesto i e reportahe di ehekushon), Cft anteriormente ya a konstatá ku e presupuesto di 2018 no tabata kumpli mas ku e normanan stipulá den e Lei di Konsenso di supervishon finansiero. Den kuadro di e trayekto di duna oido na ámbos banda (hoor- en wederhoor), e Minister di Finansa a bini ku medidanan adishonal i a entregá mas informashon. Cft sin embargo a konkluí ku ainda tin inseguridat tokante di e 'claim' ku tin riba e kompania di gobièrnu UTS, e riesgonan di Sehos i HNO i e hecho ku - mas en general - no por solushoná e problemátika finansiero struktural di pais ku medidanan ad hoc.

Un kondishon importante ta pa trese i mantené òrdu den e maneho finansiero. Sin un maneho finansiero sólido un proseso presupuestario na òrdu no ta realisabel. E prueba (real) ta ora un kuenta anual ku un deklarashon aprobatorio di akountent keda aprobá na tempu. A yega na e palabrashon ku gobièrnu di Kòrsou ta garantisá ku esaki lo tuma lugá ku e kuenta anual di 2021. Lo elaborá i stipulá un 'roadmap' pa e próksimo 2 aña. Loke ta hasi e ehekushon di e roadmap aki posibel ta ku lo fortifiká e kolumna finansiero di e aparato gubernamental lihé i den forma drástiko. Ademas a yega na palabrashon tokante mihó sistema pa efektúa impuesto i kobransa di belasting, i tambe tokante di reforma di e sistema di belasting.

Raymond Gradus, presidente di Cft: "Fortifikashon di ekonomia di Kòrsou ta rekerí prinsipalmente invershon privá. Invershonistanan privá ke redusí nan riesgonan, i nan ke por konfia riba stabilitat i kalidat di e aparato gubernamental: tantu di parti di e ámtenarnan komo di parti di gobièrnu. Un kondishon nesario pa esaki ta un maneho sólido di finansa públiko." Tokante di e palabrashonnan hasí e ta deklará: "Awor ta na gobièrnu pa ehekutá esakinan den forma desisivo i ku determinashon. Komo Cft nos lo sigui esaki ku un bista hopi krítiko." Cft lo informá konseho di minister di Reino tokante di e medidanan ku gobièrnu a tuma i e palabrashonnan ku a hasi ku Cft.

Durante di su bishita na Kòrsou Cft a bishitá Gobernador, Konseho di Minister, Minister di Finansa, komishon finansiero di Parlamento, e Direktor i Supervisor Ministerial (Ministeriële Regisseur en Toezichthouder) pa e hòspital nobo, gerensia di Banko Sentral i gerensia di refinaria. Esaki tabata e promé bishita di e miembronan nobo di Cft Henk Kamp (riba proposishon di Hulanda) i Russell Voges (riba proposishon di Sint Maarten). Huntu ku nan ta forma parti di e Kolegio e presidente Raymond Gradus i Gregory Damoen (riba proposishon di Kòrsou).

[Fin di komunikado]



Fotógrafa

Berber van Beek

Teksto pa foto:

Un kondishon importante pa yega na finansa públiko duradero ta pa trese i mantené òrdu den e maneho finansiero.

Nota pa redakshon- no pa publikashon

Persona di kontakto na Cft:

Sekretariado Kolegio di supervishon finansiero

Manus Twisk- Sekretario

Telefon (+5999) 461-9081 / (+5999) 461-9082 / (+5999) 461-9084

Email info@cft.cw

Internet www.cft.cw

Persona di kontakto pa Prensa:

Jefka Martina

Telefon (+5999) 512-6861